



Мария Шахова

Шахова Мария Михайловна чужис 1997 вося январ 6-д лунö Кекур грездын. Пожөгса школаын велöдчигöн заводитöма тэчны кывбуръяс. Гижан туй выlö чуйдöма батыс, композитор Михаил Шахов. Сийö вöзйöма гижны аслас шылад дорö кывбур. А бөртиджык Мария ветлöдлöма коми кыв да литература велöдыс Елена Александровна Игнатоваян котыртöм литературной кружокö.

Öнi Мария велöдчö Сыктывкарса канму университетын 1 курсын.

Таво «Арт» журнал нүөдiс челядь костын «АРТниян» литература конкурс. Колö вöли гижны Коми му йылысь. Жюриö пырисны культураын уджалысьяс, гижысьяс да журналистъяс, найö бөрйисны вермысьясöс «Поэзия», «Проза» да «Туялан удж» номинациясын.

Конкурс выlö воис нелямын гижöд. Талун ми вöзъям тiянлы лыддьыны Мария Шаховалысь, «Поэзия» номинацияын вермысьлысь, кывбуръяссö.

Свёлöм бердын

Арся войö

Мыйкö вунлöмтор арся вой шöпкö.
Эзысь тöлысьнас шензя, ог узь.
Сöстöм сынöдöн ывласянь öвтö.
Войыс кöдзыд, а вывти на кузь.
Эзысь тöлысьыс мыйкö да сетас.
Дыр нин шобрöдлö, эг аддзыв вöт.
Кыськö лов пиысь гижöдтор петас –
Дженьыд кывбур, а сы бöрся мöд.
Арся пемыдыс мöвпъясöн сöвтö,
Мыйысь ёнджыка сьöктаммö лов.
Мыйкö вунлöмтор дум выlö чöвтö
Муса мортöс, код важöн оз ков.

Ичөтдырся кадöй, ыджыд мамлөн шаньга...
 Коркө чойöй-вокöй ыдждöдлiсны: «Кага».
 Öнi чöвтны-куртны абу нин ме дзоля,
 Мед жö эськö мортыд вит арöса колян.

– Мамö, пожъясь öтнад, ворсны кайла.
 – Он мун, меным отсасъышт.
 – Мамö, пожъясь öтнад, ворсны кайла
 И бөр локта. – Водзсаси.
 Сiйö луныс коли качай дорын...
 Юрын кадыс вожъясьö.
 Кызь во мысти вои Эжва дорö –
 Мамö век на пожъясьö.

Ань

Век йирис сьöкыд олöм аньсö,
 И сiйö кусiс, кыдзи би.
 Зэв бура тöдлiм бурсö, шаньсö
 Да шогсям сиктын ставөн ми.
 Шань верöс война вылö усис,
 И пьянлы сэн воис пом.
 Эз чеччыны тай найö гусьыс,
 Эз ло тай сьöлöм бара том.
 Сiдз курыд шогөн удж век тöдiс,
 Эз дзиръя костö топöд лов.
 Ас няньөн-солөн нэмсö пöтiс,
 Кын пачөн некорсö эз ов.
 Ми кытчöдз асьным олам-вылам,
 Век юрын лоас миян ань.
 Сы моз жö тöждөн-могөн олöй,
 Мед ставыс миян вöлi шань.

Сьöлöм бердын

Сиктлөн дона увтасыс и кырйыс,
 Муса орчча парма вöрлөн мич.
 Вежöрын на, кыдзи ичөтдырйи,
 Аддзи югыд дзоридзьяса видз.
 Ставыс тайö сьöлöм бердын олö.
 Тайö ставыс некор дзик оз вун.
 Ставыс тайö меным сiдз жö колö,
 Кыдзи арын шоныд гожся лун.